

SA BUKA TE DANIELA Sa Vinabakala

Sa buka te Daniela si ta kubere si asa pa korapana sa totošo sapu ta raovo na koa tasuna sari na tie Ziu koasa baṇara huporona. Va ene gunia sa tie kubekubere hie pa nana vivinei meke pa tinozidi sari na dinogodogorae sa nana tinokae meke na sinovutu koari na tie pa nana totošo koasa ṇati rinoverove sapu sa Tamasa kaqu va hoqa goreā sa sa baṇara sapu na koimata kaleana meke va vura sage pulea meke va naqitia sa binaṇara tadi na tie te Tamasa.

Sa buka si koa ia karua ṇati pinaqaha: (1) Sa vivineina soti e Daniela meke sari kaiqa tie sapu ta raovodi meke koa va seu pa dia popoa, meke ari na tie hire pa korapa dia kinalavarae la koe Tamasa meke pa dia rinaṇerane na vinapepekae si koa mataqara valeana si arini koari na dia kana. Sari na vivinei hire si ta evaṇa meke goto pa totošo sapu soto la koasa binaṇara pa Babiloni meke Pesia. (2) Kaiqa vinari luli vivinei pa dinogodogorae te Daniela si ta tozi pa vina padapadae la koari tiṇitoṇa sapu na vina gilagila tadi hopeke popoa na butubutu baṇara. Sari butubutu baṇara meke sari dia niniranira si kote turu sage mae meke hoqa gore pule, podalae koasa butubutu baṇara huporona pa popoa Babiloni sapu ta tozi va kenuē sa nana hinoqa gore pule na vina kilasa, meke tozia

tugo sa sa minataqara, binokaboka, meke sa niniranira tanisa butubutu banara te Tamasa.

Sari na Nati Pinaqapaqahana sa Buka

Daniela meke sari nana baere. Hinia 1:1 kamo hinia 6:28

Sari na dinogodogorae te Daniela. Hinia 7:1 kamo hinia 12:13

a. Sari ka made kurukuru name. Hinia 7:1-28

b. Sa sipi kokoreo meke sa qoti. Hinia 8:1 kamo hinia 9:27

c. Sa mateana manauru pu tozi inavoso. Hinia 10:1 kamo hinia 11:45

d. Sa totošo pa vina betona sa kasia popoa. Hinia 12:1-13

Daniela meke sari Nana Baere

1:1, 6:28

Sari Koreo Vaqura pa Vetu Banara te Nebukaneza

¹ Pa vina neta vuaheni sapu koa banara se Zehoiakimi pa Ziuda, si la rapata pa Zerusalema se Nebukaneza, sa banara pa Babiloni.* ² Meke va malumu vala nia Zihova se Zehoiakimi, sa banara pa Ziuda, pa limana e Nebukaneza, turaŋae kaiqa likakalae hopedi pa Zelepade te Tamasa. Hire si paleke lani sa koasa zelepade tanisa nana tamasa pa Babiloni meke la vekoi sa koasa lose poata pa vetu tanisa nana tamasa.*

³ Meke garunia sa banara Nebukaneza se Asapenazi, sa nana nati palabatu tinavete, pude vizata vagi kaiqa tie vaqura pa Izireli koari kasa

* **1:1** 2 Baŋ 24:1; 2 Koron 36:5-7 * **1:2** 2 Baŋ 20:17-18, 24:10-16; 2 Koron 36:10; Ais 39:7-8

pa tuti baṇara meke koari pa pinodo pinalabatu. ⁴Ari na tie vaqura sapu loke vasi kisakisadi, arini pu doṇo lea, tumaedi va nonoga, gilagilanadi, meke tuturei vagi vina tumatumae, meke padadi pude nabulu pa vetu baṇara. Kaqu va tumatumae ni sa sa vinekala pa Babiloni meke pude tiro meke kubere pa zinama Babiloni. ⁵Doduru rane si keke pada ginani meke vaeni si hia poni sa baṇara pude henai rini sari ginani mae gua pa tevolo tanisa baṇara. Ka neta vuaheni si kote tava tumatumae si arini, meke mudina asa si kote tava nuquru si arini pude nabulu nia sa baṇara.

⁶Pa vari korapa dia arini si kaiqa sapu mae guadi pa Ziuda: ari Daniela, Hananaea, Misaelo, meke Azaraea. ⁷La sa nati palabatu tinavete meke poni ni pozapoza vaqura; e Daniela si e Belotesaza; Hananaea* si e Sedareki; Misaelo si e Misake; meke e Azaraea si e Abedeniko.

⁸Ba se Daniela si va nṇira binalabala pude lopu va boni pule nia si asa koari na ginani na vaeni tanisa baṇara, meke tepa vina malumu si asa koasa nati palabatu tinavete pude lopu va boni pule nia si asa koari na ginani sapu tava madi koari na tamasa huporodi. ⁹Ele la sa Tamasa meke ponía binalabala sa palabatu pude tataru nia se Daniela, ¹⁰ba zama sa palabatu koe Daniela, “Arau ba na matagutu nia sa baṇara, sina asa tu hia poni gamu sari mia ginani na

* **1:7** Sa ginuana sa pozana Hananaea si “Zihova si Tataru ni gita”, Misaelo sa ginuana si “Zihova sa Tamasa”, Azaraea si “Zihova si va tukana”, meke sa ginuana Daniela si “sa Tamasa si na qua tie varipitui”.

napo. Na kote dogoro gamu sa baṇara viviqe mia, holani sari kaiqa tie vaqura. Meke kote la sa baṇara meke kupa pania sa batuqu pa ginugua mia.”

¹¹ Meke zama laia Daniela sa tie kopu sapu vekoa Asipenazi pude kopu ni sari Daniela, Hananaea, Misaelo, meke Azaraea, ¹² “Mamu podeki sari mua nabulu koari ka manege puta rane: Poni gami ginani elelo na vua huda* pude henai meke kolo pude napo meke loketona pule.

¹³ Beto mamu vari padapada ni kineha mami koari kasa tie vaqura pu henai sari ginani tanisa baṇara, mamu tavete lulia gua sapu dogoria goi koari mua nabulu.”

¹⁴ Va egoa sa tie kopu meke podeki sa koari ka manege puta rane. ¹⁵ Sipu ele hola sa totošo ta mutina, si sari ka made koreo pa Izireli hire si toa valeana hola, meke ninira, hola ni rini saripu henai sari ginani tana baṇara. ¹⁶ Ke podalae koasa totošo asa va malumia sa tie kopu pude madi henai mo sari na vua huda na linetelete, meke ginani elelo ba lopu sari na ginani arilaedi meke sa napo vaeni sapu va namanama ni sa baṇara pude tadirini.

¹⁷ Ponini Tamasa koari ka made koreo vaqura pa Izireli sa tinumatumae meke na ginilagilana koari doduru kinubekubere meke vina tumatumae. Meke ponia tugo Sa koe Daniela sa binokaboka pude rupahi meke iliri va bakali sari na dinogodogorae meke na pinutagita.

* ^{1:12} Lopu hiva nia rini sa ginani ta madi koari na tamasa huporo.

¹⁸ Pa vina betona sa totošo sapu pada vekoa sa baṇara, si turana lani sa nati palabatu tinavete sari koreo vaqura koe Nebukaneza. ¹⁹ Vivinei i sa baṇara sari kasa meke dogoria sa sapu lopu keke arini si tata kamo laia sa binokaboka tadi Daniela, Hananaea, Misaelo meke Azaraea; ke podalae nabulu nia rini sa baṇara. ²⁰ Pa doduru ginugua pa ginilagilana lohidi meke pa vinabakala sapu nanasa ni sa baṇara, si manege puta totošo holani rini sari doduru tie vakuvakutae na kokorotae pa doduruna sa nana binanara. ²¹ Meke koa se Daniela vasina osolae kamō sa vuaheni kekenu tanisa baṇara Saerasi.

2

Pinutagita te Nebukaneza

¹ Pa vina rua vuahenina sa binanara te Nebukaneza si putagita si asa; meke matagutu meke lopu boka puta pule. ² Ke tioko vagi sa sari na tie korokorotae, tie vakuvakutae, na matemateana meke ari tie tiro pinopino pude va bakalia sa nana pinutagita. Totoso nuquru mae si arini meke turu pa kenuna sa baṇara,* ³ si zama si asa koa rini, “Arau si putagita meke va tasuna au sa; meke hiva tumae nia rau sa ginuana sa.”

⁴ Meke olaṇa la ia ri na tie sa baṇara pa zinama Arameiki*, “Kei baṇara, mu toa hola ninæ rane! Tozi mae nia koari mua nabulu sa pinutagita, pude mami rupaha vatu nia.”

* **2:2** Zen 41:8 * **2:4** Podalae pa vesi made meke kamo pa vinabetona hinia zuapa sa kinubekuberena sa buka hie pukerane si pa zinama Arameiki.

⁵ Olani sa banara sari na tie, “Hiera gua sa qua hiniva sapu ele va nabu vekoa rau: Be lopu tozi nau gamu sa qua pinutagita meke lopu rupaha mae nia gamu, si kote ta magu va umumu si gamu meke sari mia vetu si kote ta evanae na kobi remoremo. ⁶ Ba be pana tozi nau gamu sa pinutagita meke rupaha mae nia sa laena, si kote vagi vinariponi meke vina lavata nomana si gamu koa rau. Ke tozi nau sa pinutagita, mamu rupaha poni au.”

⁷ Ke olana pule si arini, “Mani tozi nia sa banara koari nana nabulu sa pinutagita, pude mami rupaha vatu nia.”

⁸ Meke olana sa banara, “Tumae nia rau sapu korapa hiva va sasanae si gamu, sina gilancia gamu sapu ele va nabu ia rau sa qua binalabala, ⁹ sapu pana lopu tozi nau gamu sa qua pinutagita si keke mo sa mia vinakilasa. Ele kuhana nia gamu pude tozi nau sari vivinei kokohadi meke sekesekeidi; na hokara kote hobe sari ginugua, gua si gamu. Ego kamahire tozi nau sa pinutagita, pude gua si kote tumae nia qua sapu kote boka rupaha mae nia mo gamu koa rau si asa.”

¹⁰ Olana la ia ri na tie sa banara, “Loke tie pa popoa pepeso kote boka tavetia gua sapu tepa ia sa banara! Loke banara, vea nomana gua ba be ninirana gua, ele nanasa nia sa tinitonu gugua asa koari na tie korokorotae, tie vakuvakutae, meke ari tie tiro pinopino. ¹¹ Sapu gua nanasa nia sa banara si tasuna hola. Loke tie kote boka va dogoro nia koasa banara, ba sari na tamasa

mo si kote boka, ba lopu koa turani arini sari na tie.”

¹² Gua si bugoro sisigiti meke ta nazihi hola sa banara, meke garunu nia sa pude va mate betoi sari tie totoli tanisa banara pa Babiloni. ¹³ Ke na ginarunu si ta tavete pude va mate betoi sari tie totoli tanisa banara pa Babiloni, meke la sari pude hata vagi sari Daniela meke sari nana baere pude va matei, gua.

Va Dogoro nia Tamasa Koe Daniela sa Pinutagita meke sa Rinupahana

¹⁴ Totoso la se Arioko, sa palabatu koari tie kopu tanisa banara, pude va matei sari tie totoli tanisa banara pa Babiloni, si vizata va leana i Daniela sari nana zinama pude gotogoto meke zama si asa, ¹⁵ nanasia sa sa palabatu tanisa banara, “Na vegua ke ninira hola sa ginarunu tanisa banara?” Meke va bakala la nia e Arioko sa ginugua koa sa.

¹⁶ Gua, ke topue la se Daniela koasa banara meke tepa pude ponua totoso, pude kote boka rupaha vala nia Daniela sa pinutagita koa sa.

¹⁷ Meke pule se Daniela pa nana vetu meke va bakala la nia sa koari nana baere, sari Hananaea, Misaelo, meke Azaraea, sapu ele ta evana. ¹⁸ Meke garuni sa pude varavara tepatepa la koe Tamasa pa Manauru, tepa ia sa Nana tataru variharupi pude harupi koasa ginuguana sa pinutagita sapu lopu ta tumaena, pude lopu tava mate si asa meke sari nana baere, turanae koari na tie totoli tanisa banara pa Babiloni. ¹⁹ Pana boni si vura mo koe Daniela sa pinutagita sapu lopu ta tumaena pa

dinogodogorae. Meke vahesia Daniela sa Tamasa pa Mañauru.

²⁰ Zama si asa: “Vahesia sa Pozana sa Tamasa ninae rane ka rane;

Tanisa sa ginilagilana lohina^d meke sa niniranira.

²¹ Asa hobei sari na totošo meke na sidara; sari na binañara si va turui Sa meke va gorei Sa.

Sa ginilagilana lohina meke sa tinumatumae si poni lani Sa koa rini pu gilae.

²² Sari tinitoña sapu lohidi meke tomedi si va vurai Sa;

sapu koa pa huporo ba tumae ni Nana, na koa koa Sa sa kalalasa.

²³ Zama leana si arau meke vahesi Igo rau, Agoi Tamasa tadi na tamaqu:

Agoi poni nau ginilagilana meke niniranira, sapu tepa ia gami koa Goi si ele vata gilana nia Goi koa rau, ele vata gilana nia Goi koa gami sa pinutagita tanisa bañara.”

Tozia Daniela Koasa Bañara sa Pinutagita meke Rupahia Sa

²⁴ Meke la se Daniela koe Arioko, sa tie sapu garunia sa bañara pude va matei sari tie gilagilana pa Babiloni, meke zama si asa koa sa, “Lopu va matei sari tie gilagilana pa Babiloni. Turana lani au koasa bañara pude maqu rupaha vala nia koa sa sa nana pinutagita.”

²⁵ Ke hinoqa turana la nia Arioko se Daniela koasa bañara meke zama, “Ele dogoria rau si keke tie koari na tie ta raovodi pa Ziuda sapu

kote boka tozi nia sa baṇara sa ginuana sa nana pinutagita.”

²⁶ Meke nanasia sa baṇara se Daniela sapu ta pozae e Belotesaza si asa, “Vea, boka tozi nau goi gua sapu dogoria rau pa qua pinutagita meke va rupaha mae nia tugo goi?” gua si asa.

²⁷ Olaṇa se Daniela, “Loke tie gilagilana, tie vakuvakutae, na tie kokorotae, babe na matemateana kote boka tozi nia sa baṇara sa pinutagita sapu nanasa nia sa, ²⁸ ba koa nana sa Tamasa pa Maṇauru sapu boka dogoro vura ni sari tiṇitoṇa sapu tasuna pude tumaeni. Asa ele vata dogoro nia koe baṇara Nebukaneza sapu na sa si kote ta evaṇa koari na rane sapu kote mae. Sa mua pinutagita meke sa dinogodogorae sapu kamo pa mua binalabala sipu korapa eko mua pa mua tege si gua hie:

²⁹ Kei baṇara, sipu korapa eko puta goi si sa mua binalabala si kamo la koari tiṇitoṇa sapu kote kamo mae, meke sa Tamasa pu vata dogoro tiṇitoṇa tomedi si vata dogoro nia koa goi sapu na sa si kote ta evaṇa. ³⁰ Ego, koa rau, si tava vura mae sa tiṇitoṇa tomena hie, lopu sina tagoa rau sa ginilagilana lohina sapu hola ni pule sari kaiqa tie toadi, ba pude agoi, baṇara, si tumae nia sa rinupahana sa meke pude va bakalia koa goi sapu na sa si ele kamo pa mua binalabala.

³¹ Baṇara, doṇo la si agoi, meke pa kenumu agoi si turu nana si keke tigono lavata; noma hola si asa, ṇedalana meke variva matagutu sa dinonoṇa. ³² Sa batuna sa tigono si ta tavetae qolo viana, sa raqaraqana meke sari limana si na siliva, sa tiana meke sari pudapudana si

boronizi, ³³ sari nenena si aeana, sari pepetala nenena si ta tavete pa vinarihenie aeana meke pepeso ta kinadi pa nika. ³⁴ Sipu korapa dono la agoi, si ta magu vura si keke patu, lopu pa lima tie. Topili gore mae meke goto ia sa sa tigono koari pepetala nenena, sapu na vinarihenie aeana meke pepeso, meke huara i sa. ³⁵ Meke sari aeana, pepeso, siliva, meke sari qolo si moku umumu pa totošo tugo asa meke ta evanae guana kavuru sapu koa hola pa vasina ta paqaha sari na kiko huiti koari na qaqalotodi pa totošo pakepakete. Mae sa givusu meke paleke taloani meke lopu nonoga dia mo. Ba sa patu sapu mae goto koasa tigono si ta evanae na togere lavata meke sini ia sa sa kasia popoa.

³⁶ Asa sa pinutagita, meke kamahire kote rupaha vatu nia rau koasa banara. ³⁷ Agoi, banara, si na banara tadi na banara. Sa Tamasa pa Mañauru na poni nigo sa binanara, meke niniranira, meke binokaboka meke vina lavata. ³⁸ Pa limamu vekoi Sa sari tinoni meke kurukuru name meke sari kurukuru pa galegaleane. Be pavei koa si arini ba Asa ele veko igo pude banara ni. Agoi sa batu qolo. ³⁹ Pa mudimu agoi, si keke butubutu banara pule si kote sage mae, sapu kali gore hite koa goi pa niniranira. Beto si, vina neta butubutu banara, asa sa boronizi, sapu kote banara nia sa doduruna sa kasia popoa. ⁴⁰ Mumudi, kote mae sa vina made butubutu banara, sapu ninira guana aeana, ura na aeana moku va umumi sari likakalae, ke kote huari sa meke mokui sa sari doduru pu koa kekenu koa sa. ⁴¹ Gua sapu dogoria goi, sapu

sari pepetala nene meke kakarutu nene si na vinari henie aeana meke pepeso, ke sa butubutu baṇara hie si kote ta paqaha; gua ba kote niṇira vasinahite guana aeana si asa, sina koa ia aeana sapu henia na pepeso. ⁴² Sina sari pepetala nene si na vinarihenie aeana meke pepeso, ke sa butubutu baṇara hie si kote niṇira guana aeana keke kalina, meke malohoro guana pepeso keke kalina. ⁴³ Meke gua mo sapu dogoria goi, sapu sa aeana si heni pepeso, ke sari tie si kote na vinari henie meke lopu kote koa keke, gua mo sa aeana sapu lopu heni valeana pa pepeso. ⁴⁴ Koasa toতোসো তাদি না বাṇara arini, si kote va turu ia sa Tamasa pa Maṇauru si keke butubutu baṇara sapu kote loke vina betona, meke lopu kote boka ta huara. Kote la sa meke huara pani sari doduru butubutu baṇara arini, ba asa telenā si kote turu hola ninae rane. ⁴⁵ Hie sa rinupahana sa dinogodogorae koasa patu sapu ta viqala vurana koasa toqere, ba lopu pa lima tie, sa patu sapu huara umumi sari aeana, boronizi, pepeso, siliva, meke na qolo.

Sa Tamasa lavata ele va dogoro nia koasa baṇara sapu na sa si kote ta evaṇa vugo repere. Sa pinutagita si hinokara meke sa rinupaha si ta raṇena.”

Pia ia sa Baṇara se Daniela

⁴⁶ Meke hoqa kokotuṇu pa kenuna e Daniela se baṇara Nebukaneza meke va lavatia sa meke garuṇi sa pude va vukivukihi va uququ oto huda la koe Daniela. ⁴⁷ Zama sa baṇara koe Daniela, “Hinokara sa mua Tamasa sina Tamasa tadi na tamasa meke sa Baṇara tadi na baṇara, meke

sari tinitona tomedi ba va vura i Sa, ura na agoi mo si boka va vura ia sapu tomena hie.”

⁴⁸ Meke vekoa sa banara se Daniela pa keke tuturuana ululuna meke ponía soku vinariponi sa. Va kopu nia sa sa doduruna sa pinaqaha popoa pa Babiloni meke asa tugo si palabatu ni sa sari doduru tie gilagilana vasina. ⁴⁹ Pa tinepa te Daniela si vekoi sa banara sari Sedareki, Misake, meke Abedeniko pude na palabatu tinavete koasa pinaqaha popoa pa Babiloni, ba e Daniela si koa na tie totoli tanisa banara.

3

¹ Tavetia e Nebukaneza sa banara si keke beku qolo sapu ka hiokona zuapa mita ululuna meke tata neta mita labena,* meke va turu ia sa koasa pezara pa Dura koasa pinaqaha popoa pa Babiloni. ² Meke tioko vagi sa sari na koburu tavia, palabatu tinavete, qavuna, tie roverove, palabatu poata, tie varipitui, tie totoli meke sari doduru palabatu tuturana koari na hopeke pinaqaha popoa pule, pude mae koasa vina madina sa beku sapu va turu ia sa. ³ Ke varigara beto sari na koburu tavia, palabatu tinavete, qavuna, tie roverove, palabatu poata, tie varipitui, tie totoli meke sari doduru palabatu tuturana koari na hopeke pinaqaha popoa, pude va madi ia sa beku sapu va turu ia e banara Nebukaneza. Meke la turu si arini pa kenuna sa beku. ⁴ Meke velavela vura sa palabatu tinavete, “Gamu na tiedi ri doduru butubutu meke tiedi

* **3:1** Sa ululuna si manege lima nava, meke sa labena si keke nava kali lima.

ri doduru vinekala, hiera gua si ta garunu nia gamu pude tavetia: ⁵ Pana avosi tugo gamu sari kabodi ri na buki, ivivu, mike, lohe, meke doduru kineha miuziki, si kaqu hoqa todoño si gamu meke vahesia sa beku qolo sapu va turu ia e baṇara Nebukaneza. ⁶ Asa sapu lopu hoqa todoño meke vahesi, pa totošo tugo asa, kaqu ta gona la pa nika huruṇuna.” ⁷ Gua ke, totošo avosi tugo rini sari kabodi ri na buki, ivivu, mike, lohe, meke doduru kineha miuziki, si hoqa todoño sari doduru tinoni, butubutu meke tiedi ri doduru vinekala, meke vahesia rini sa beku qolo sapu va turu ia e Nebukaneza sa baṇara.

Seke Tinarae sari ka Neta Baere te Daniela

⁸ Pa totošo asa si mae sari kaiqa tie soti pa Babiloni meke zutui sari tie Ziu. ⁹ La zama si arini koe Nebukaneza sa baṇara, “Kei baṇara, mu toa hola ninae rane! ¹⁰ Baṇara, ele va turu ia goi sa tinarae, sapu sari doduru pu avosi sari kabodi ri na buki, ivivu, mike, lohe, meke doduru kineha miuziki, si kaqu hoqa todoño meke vahesia sa beku qolo, ¹¹ meke asa pu lopu hoqa todoño meke vahesia si kaqu ta gona la pa korapa nika huruṇuna. ¹² Ba koa dia sari kaiqa tie Ziu sapu ele va palabatu tinavete i goi koa sa pinaqaha popoa pa Babiloni, sari Sedareki, Misake, meke Abedeniko, arini sapu lopu hiva va avoso atu koa goi. Kei baṇara, lopu hiva va nabulu atu si arini koari na tamasa tamugoi meke lopu hiva vahesia rini sa beku qolo sapu va turu ia goi.”

¹³ Ta nāziri hola se Nebukaneza meke va garunu la tie si asa pude va mae i sari Sedareki,

Misake, meke Abedeniko. Ke ta turana mae si arini pa kenuna sa banara, ¹⁴ meke zama la i Nebukaneza si arini, “Vea, hinokara sia, ta Sedareki, Misake, meke Abedeniko, sapu gamu si koromia va nabulu la koari na qua tamasa meke lopu hiva vahesia gamu sa beku qolo sapu va turu ia rau? ¹⁵ Ego, pana avosi gamu sari mamalainidi sari na buki, ivivu, mike, lohe, meke sari doduru kineha miuziki, be va nama pude hoqa todoño si gamu pude vahesia sa beku qolo sapu tavetia rau, si kote leana hola mo. Ba be pana lopu vahesia gamu si kote hinoqa ta gona nuquru la si gamu pa korapa nika hurununa. Pana gua si, na tamasa savana kote boka harupu gamu koasa limaqu?”

¹⁶ Olanā la sari Sedareki, Misake, meke Abedeniko koasa banara, “Kei banara Nebukaneza, lopu kote va lavelave puleni gami si gami pa kenumu koasa ginugua hie. ¹⁷ Kei banara, be ta oki nuquru la si gami koasa nika halalana, si sa Tamasa sapu nabulu nia gami si boka harupu gami koasa nika, meke kote harupu gami Sa pa limamu goi. ¹⁸ Ba be guana lopu harupu gami Sa, ba hiva nia gami pude tumae nia goi, banara, sapu lopu kaqu va nabulu la tugo si gami koari mua tamasa babe vahesia sa beku qolo sapu va turu ia goi.”

Hiva Va Matei Rini sari ka Neta Baere te Daniela

¹⁹ Ta dogoro pa isumatana sapu ta naziri hola ni e Nebukaneza sari Sedareki, Misake, meke Abedeniko. Ke garuni sa pude va ninira ia sa nika ka zuapa totošo pule, hola nia sapu hoke

gugua, ²⁰ meke tozi ni sa sari kaiqa tie n̄n̄iradi koasa nana qeto minate pude pusi sari Sedareki, Misake, meke Abedeniko meke gona nuquru lani koasa nika halalana. ²¹ Ke sari ka neta tie hire pu pokoni sari na dia poko gele, pokonene, pusi batu, meke kaiqa poko pule, si ta pusi meke ta gona nuquru la pa korapa nika halalana. ²² Sina sa ginarunu tanisa banara si n̄n̄ira hola meke sa nika si manini hola ke la sa hurununa sa nika meke va matei sari varane totozo la gonani rini sari Sedareki, Misake, meke Abedeniko pa nika, ²³ meke hoqa nuquru la sari ka neta tie hire, sapu ta pusidi va leana, pa korapa nika hurununa.

²⁴ Meke hodahodaka se Nebukaneza meke gasa turu meke nanasi sa sari nana tie totoli, “Vea, lopu ka neta tie tu si pusi gita meke gona nuquru ni pa nika?”

Meke olaṇa si arini, “Uve, gua tugo, banara.”

²⁵ Zama si asa, “Dono la! Ka made tie tu si dogori rau ene lamae dia pa korapa nika, lopu ta pusidi meke lopu ta sigiti dia, meke sa vina made si guana tudia rina tamasa,” gua si asa.

Sari Ka Neta Tie si Ta Rupaha meke Tava Ululu Sage pa Dia Tinavete

²⁶ Ke ene tata la se Nebukaneza pa sadana sa nika meke kukili la, “Sedareki, Misake, meke Abedeniko, gamu na nabulu tanisa Tamasa Ululuna Hola, vura mae! Mae tani!”

Ke vura koasa nika sari Sedareki, Misake, meke Abedeniko, ²⁷ meke la sari koburu tavia, palabatu tinavete, qavuna, tie roverove, palabatu poata, tie varipitui, tie totoli, meke vari likohae

ni rini sari ka neta. Dogori rini sapu lopu tiqui sa nika sari tinidia, meke sari kaludia ba lopu uqu; sari dia poko ba lopu nadai, meke lopu hite humaņa maratunaha si arini.

²⁸ Zama sa banara, “Mani tavaheſi sa Tamasa tadi Sedareki, Misake, meke Abedeniko, sapu garunu mae nia sa Nana mateana pude harupi sari Nana nabulu! Raņa rini si Asa meke va karia rini sa vina turu tanisa banara. Malumu si arini pude mate, pude lopu va nabulu la babe vahesi sari kaiqa tamasa pule; ba dia Tamasa eke mo si kaqu vahesia rini.

²⁹ Gua ke va turu ia rau kamahire sapu be esei sari tie, nasa sa dia butubutu na vinekala, sapu zama nonoſalia sa Tamasa tadi Sedareki, Misake, meke Abedeniko, si kaqu ta magu va umumu, meke sari dia vetu si kote ta evaņa na kobi remoremo; ura na loke tamasa pule si kote boka variharupi gugua hie.”

³⁰ Meke va rizu sage lani sa banara Nebukaneza sari Sedareki, Misake, meke Abedeniko pa tuturuana ululudi, koasa pinaqaha popoa pa Babiloni.

4

Vina Rua Pinutagita te Nebukaneza

¹ Na zinama tanisa Banara Nebukaneza la koari na tinoni, butubutu, meke sari tiedi ri doduru vinekala, pu koa pa doduruna sa kasia popoa:

Mi koa tagotago nono la tu si gamu!

² Qetu si arau pude tozi koa gamu sari vina gilagila meke na tinavete variva magasa sapu tavete mae ni sa Tamasa Ululuna Hola koa rau.

³ Nake noma hola sari Nana vina gilagila, nomadi hola sari Nana tinavete variva magasadi!

Sa Nana butubutu banara si na butubutu banara sapu koa hola ninae rane;
sa Nana binañara si turu hola pa doduru sinage na sage.

⁴ Arau, Nebukaneza, si koa qua pa qua vetu banara; qetuqetu qua meke tagotago qua. ⁵ Ba kamo si keke pinutagita sapu va matagutu au. Sipu korapa eko puta rau pa qua teqe, si dogori rau sari kineha na dinogodogorae sapu va matagutuqu. ⁶ Ke garuni rau sari doduru qua tie totoli pa Babiloni pude mae pa kenuqu pude rupaha mae nia koa rau sa pinutagita asa. ⁷ Totoso mae sari na tie korokorotae, na matemateana, na tie tiro pinopino, si tozini rau koa rini sa pinutagita, ba lopu boka rupaha mae nia tu rini koa rau. ⁸ Vina betona si mae se Daniela koa rau meke tozi nia rau sa pinutagita. Keke pozana si e Belotesaza, ta poza luli koasa qua tamasa, meke sa maqomaqo tadi na tamasa hopedi si koa pa korapana sa. ⁹ Zama si arau, “Belotesaza, palabatu tadi na tie korokorotae, gilania rau sapu sa maqomaqo tadi na tamasa hopedi si koa pa korapamu agoi, meke loketona sapu tomedi si tasuna koa goi. Hie sa qua pinutagita. Mu va rupaha mae nia koa rau sa ginuana.

¹⁰ Hire sari dinogodogorae sapu dogori rau

sipu korapa eko puta rau pa qua teqe: Dono la si arau, meke koa nana pa kenuqu si keke huda pa kokorapana sa popoa. Sa ululuna si hola sisigiti. ¹¹ Toqolo va noma hola sa huda meke ninira meke sa batuna si tiqu sage la pa galegalearane; meke dogoro betoa mo ri doduru hukihukirina sa kasia popoa si asa. ¹² Sari elona sa si leleadi hola meke sari vuana si soku hola, meke doduru tie si boka hena mo koa sa. Pa kauruna si aqoro sari kurukuru pinomo meke koari lelanana si tavete vori sari kurukuru tapuru; doduruna sa kasia popoa si hena mo koasa.

¹³ Koasa pinutagita sapu dogoria rau sipu korapa eko puta rau pa qua teqe, si dono la si arau, meke koa nana pa kenuqu si keke tie paleke inavoso, na tie hopena, gore mae guana pa manauru. ¹⁴ Velavela va ululae sisigiti si asa, 'Maho gore nia sa huda, mamu rakoti sari lelanana; vagi pani sari elona, mamu va hurakatae i sari vuana. Va goveti sari kurukuru pinomo pa kauruna sa meke gua tugo sari kurukuru tapuru pa lelanana. ¹⁵ Ba vekoi sari karosona meke dadagana; pusi ni aeana meke boronizi, vekoi mani koa pa pepeso, koari na duduli pa pezara.

Vekoa si asa, mani bobosia na puni pa manauru; vekoa mani koa turani sari kurukuru pinomo meke sari linetelete pa popoa pepeso. ¹⁶ Vekoa mani ta hobe sa binalabala tanisa, mani ta poni nia sa sa binalabala tadi na kurukuru pinomo, osolae hola koasa sari ka zuapa vuaheni. ¹⁷ Sa binalabala tava egona

si ta tozi vura koari na tie paleke inavoso, sari tie hopedi tozi vura nia sa vinizata hie, pude tumae nia ri na tie toadi sapu sa Tamasa Ululuna Hola si banarani sari na butubutu banara tadi na tie meke poni Sa si arini pu hiva poni Sa meke va palabatu i Sa koa rini sari pu lopu hite arilaedi pa tie.'

¹⁸ Hierana sa pinutagita taqarau, arau banara Nebukaneza. Ego, Belotesaza tozi nau, na sa si guni nia sa, ura lopu keke koari na tie gilagilana pa qua butubutu banara boka rupaha poni nau. Ba agoi kote boka mo, sina sa maqomaqo tadi na tamasa hopedi si koa pa korapamu agoi."

Rupahia Daniela sa Pinutagita

¹⁹ Ba nunala se Daniela sapu Belotesaza keke pozana pa totoaso asa, sari nana binalabala va matagutu ia. Ke zama sa banara, "Belotesaza, mu lopu va malumia sa pinutagita babe sa laena sa pude va matagutu igo."

Olaṇa se Belotesaza, "Qua banara, be tadi na mua kana sa pinutagita hie babe tadi na tie pu kukiti nigo, be leana! ²⁰ Sa huda sapu dogoria goi, sapu toqolo va noma meke ṇinira, meke sa batuna si tiqu la pa galegaleane, meke ta dogoro pa doduruna sa popoa pepeso, ²¹ sari elona si leleadi meke katakata sari vuana; poni ginani sa sari doduru, va aqori sa sari na kurukuru pinomo pa pezara, meke sari lelanana si tavete ni vorī ri na kurukuru tapuru, ²² banara, agoi mo sa huda asa! Agoi si na banara lavata meke ṇinira; sa mua vinalavata si kamo la pa galegaleane, meke

baṇara ni goi sari doduru kamo la koari na vasidi pa seu koasa kasia popoa. ²³ Kei baṇara, agoi dogoria sa tie paleke inavoso, sa tie hopena, gore maena pa maṇauru meke zama, ‘Maho gore nia sa huda mamu huara pania, ba vekoa mani koa ta pusi pa aeana meke boronizi sari dadagana, koari na duduli pa pezara, ba sari karosona si kaqu koa hola pa pepeso. Vekoa si asa mani bobosia na puni pa maṇauru; mani koa guana kurukuru pinomona si asa, osolae hola si ka zuapa vuaheni.’

²⁴ Kei baṇara, ego, hiera gua sa rinupahana sa, meke hie sa inavoso sapu va vura ia sa Tamasa Ululuna Hola, la koasa qua palabatu sa baṇara. ²⁵ Kote ta hadu vura si agoi koari na tie meke kote koa turani goi sari na kurukuru pinomo; kote hena duduli si agoi guana bulumakao meke kote bobosigo na puni pa maṇauru. Ka zuapa vuaheni si kote hola gua osolae tumae nia goi sapu Sa Tamasa Ululuna Hola si Baṇara holani sari na butubutu baṇara tadi na tie meke vari poni lani Sa koarini pu hiva poni Sa. ²⁶ Sa laena sa ginarunu pude vekoa sa dadagana sa huda turanae sari karosona, si sa mua butubutu baṇara si kote ta poni pule nia goi pana guana helahelae nia goi sapu sa Tamasa si Baṇara nia sa kasia popoa. ²⁷ Kei baṇara, gua ke mu va tabei sari qua vinari tokae pa binalabala: Veko pani sari mua sinea, mamu taveti gua sapu toṇoto; veko pani sari mua hahanana kaleadi, mamu tataruni saripu ta ṇoṇovala.

Hokara pude gua asa si kote hoda la sa mua tinoa ravutuna.”

Gorevura sa Pinutagita

²⁸ Sari doduru hire si ta evana beto koe banara Nebukaneza. ²⁹ Ka manege rua vua-heni mudina asa, si enene sa banara pa batu vetu koasa vetu banara pa Babiloni, ³⁰ meke zama si asa, “Vea, lopu hie tu sa Babiloni nomana sapu kuria rau pa qua niniranira nomana pude na popoa tanisa banara, meke pude na tinolava tanisa qua binanara?”

³¹ Sari zinama si korapa koa pa beruna toতো kamo mae mo si keke mamalaini pa manauru, “Hiera gua sa zinama pa gugamu agoi, banara Nebukaneza: Sa mua binanara si kamahire ta vagi palae koa goi. ³² Kote ta hadu vura koari na tie si agoi meke kote koa turani goi sari na kurukuru pinomo; kote hena duduli gua ri na bulumakao si agoi. Ka zuapa vua-heni si kote hola gua meke tiqe kote tozi vura nia goi sapu sa Tamasa Ululuna Hola si banara ni sari doduru butubutu banara tadi na tie meke Asa poni lani koarini pu hiva poni Sa.”

³³ Meke pa toতো tugo asa si tava gorevura gua sapu ta zamae pa gugana Nebukaneza. Ta hadu taloa si asa koari na tie meke hena duduli guana bulumakao si asa. Sa tinina si boboso koasa puni pa manauru osolae sari kaluna si toqolo guana kalu atata meke sari visuvisuna si guana kakarutu nenedi ri na kurukuru tapuru.

Vahesia Nebukaneza sa Tamasa

³⁴ Pa vina betona sa totoaso asa, si arau, Nebukaneza, si va ena sagei sari mataqu pa manauru, meke pule mae sa ginilae koa rau. Meke vahesia rau sa Tamasa Ululuna Hola. Va lavatia rau meke vahesia rau si Asa sapu toa hola ninae rane.
Sa Nana binanara si na binanara sapu koa hola;
sa Nana butubutu banara si koa ninira pa sinage na sage.

³⁵ Doduru tiena sa popoa pepeso
si loketona mo guni ni Sa.

Tavetia Sa gua sapu hiva nia Sa
koari na mateana pa manauru
meke koari na tiena sa popoa pepeso.

Loke tie kote boka tuqe pule nia sa limana
babe zama la koa Sa: "Na sa si tavetia Goi?"

³⁶ Pa totoaso tugo asa si pule mae sa qua ginilae, sa qua vina lavata meke tinolava si tava pule mae koa rau koasa vina lavatana sa qua butubutu banara. Hata vagi pule nau ri na qua tie totoli na palabatu meke tava habotu pule si arau koasa qua habohabotuana banara meke tava ninira hola la tu si arau, hola nia sapu tatasana. ³⁷ Ego arau, Nebukaneza, si vahesia meke va lavatia meke va ululia sa Banara pa Manauru, sina doduru tiniona sapu taveti Sa si tonoto, meke viliviliti va tonoto si Asa doduru totoaso. Meke arini pu ene pa vinahesi pule si boka va pepekae i Sa.

5

Sa Inevana te Belosaza

¹ Keke totoſo, ſipu koa baṇara ſe Belosaza, ſi tavetia ſa ſi keke inevana nomana meke ruvati ſa ſi keke tina koimata meke napo vaeni turani ſa ſi arini. ² Sipu korapa napo vaeni ſe Belosaza ſi garuni ſa ſi arini pude paleke maeni ſari na kapa qolo meke ſiliva ſapu vagi e Nebukaneza, ſa tamana, koasa Zelepade pa Zerusalema, pude napo ni ſa baṇara meke ſari nana koimata, ſari na loana, meke ſari nana barikaleqe pinauſu. ³ Ke paleke mae ni rini ſari kapa qolo ſapu ta vagidi koasa Zelepade te Tamasa pa Zerusalema, meke napo ni ſa baṇara meke ſari nana koimata, ſari loana, meke ſari nana barikaleqe pinauſu. ⁴ Totoſo napo rini ſi vahesi rini ſari na tamasa ta tavetaedi pa qolo, ſiliva, boronizi, aeana, huda, meke na patu.

⁵ Meke vura va hodaka mae ſari kakarutu lima tie meke podalae kubekubere ſi aſa koasa gobagoba, tata koasa tuturuana zuke pa vetu baṇara. Doṇo toto mo ſa baṇara totoſo kubekubere ſi aſa. ⁶ Hobe ſa iſumata tanisa meke matagutu hola nana, ziziziri ſari tunutunu nena meke lopu boka turu ſi aſa. ⁷ Kukili vura ſa baṇara pude va mae i ſari na tie vakuvakutae, na matemateana, na tie tiro pinopino*, meke zama i ſa ſari tie gilagilana hire pa Babiloni. “Aſa pu tiro ia ſa kinubekubere hie meke rupaha mae nia koa rau ſa laena, ſi kaqu tava poko pepolo ſi aſa, tava paku ſa ſeni qolo pa ruana, meke kote na vina ṇeta ſi aſa pude koimata nia ſa butubutu binanara.” ⁸ Meke nuquru beto ſari doduru tie

* **5:7** Tiro pinopino pude tozia gua ſapu kote ta evaṇa vugo repere.

gilagilana tanisa baṇara, ba lopu boka tiro ia rini sa kinubekubere babe rupahia sa ginuana. ⁹ Ke matagutu nono la se baṇara Belosaza meke hobe va kaleana sa isumatana na matagutu va hola. Sari nana koimata ba nunala.

¹⁰ Avosi sa tinana sa baṇara sari mamalainina sa baṇara meke sari koimata meke nuquru la si asa koasa lose ineṽaṇa, meke zama, “Baṇara, mu toa hola ninæ rane! Mu lopu matagutu babe nunala si goi! ¹¹ Koa nana si keke tie pa mua butubutu baṇara sapu koa ia sa maqomaqo tadi na tamasa hopedi. Pa totošo tanisa tamamu si ta gilana sapu sa tie hie si dodogoræ, tumatumaena meke tago ginilagilana lohina gugua tadi na tamasa. Se Nebukaneza sa tamamu sa baṇara si vizatia si asa pude tuturaṇa koari na tie korokorotæ, na matemateana, na tie tiro pinopino, na tie vakuvakutæ. ¹² Sa tie hie, se Daniela, sapu poza nia Belotesaza sa baṇara, si ta gilana sapu gilaena, tumatumaena, bakabakala, meke boka rupaha pinutagita, va bakali sari binalabala voridi, meke olaṇi sari ninanasa tasunadi. Tioko ia se Daniela, meke kote tozini gamu sa sa ginuana sa kinubekubere isa.”

Rupahia Daniela sa Kinubekubere

¹³ Ke ta turaṇa la se Daniela pa kenuna sa baṇara, meke zama sa baṇara, “Agoi se Daniela, keke koari na tie ta raovodi pa Ziuda sapu sa tamaqu sa baṇara na turaṇa maeni? ¹⁴ Ele avoso nia rau sapu sa maqomaqo tadi na tamasa hopedi si koa pa korapamu agoi meke sapu tago ia goi sa dinogodogoræ, tinumatumæ meke na ginilagilana lohina. ¹⁵ Sari tie gilagilana meke

vakuvakutae si ele ta vagi mae pa kenuqu pude tiro ia sa kinubekubere hie meke pude tozi nau sa ginuana, ba lopu boka tozi nau rini. ¹⁶ Ego, ele avoso nia rau sapu agoi si boka rupahi meke toñoto pule i sari tinasuna sapu soku voridi. Be boka tiro ia goi sa kinubekubere hie meke tozi nau goi sa ginuana, si kote tava sage poko pepolo si agoi meke tava sigoto seni qolo pa ruamu, meke kote tava veko si agoi pude na vina neta koasa tuturuana ululuna koasa butubutu banara.”

¹⁷ Meke olanía Daniela sa banara, “Mamu kopuni sari mña vinariponi pude mua telemu, mamu poni lani koari kaiqa pule sari mua pinia. Ba kote tiro la nia rau koasa banara sa kinubekubere meke tozi nia sa ginuana.

¹⁸ Banara, sa Tamasa Ululuna Hola poni la nia koasa tamamu, se Nebukaneza, sa binañara meke linavata, sa tinolava meke pinamaña.

¹⁹ Koa gua koasa tuturuana ululuna sapu ponía Sa koa sa, si matagutu nia ri doduru tie na butubutu si asa, meke sari tie pa doduru vinekala si neneqara pa kenuna. Arini pu hiva va matei sa si va matei sa; arini pu hiva va toa i sa si va toa i sa; arini pu hiva va sage i sa pa dia tuturuana si va sage i sa; meke arini pu hiva va pepekae i sa si va pepekae i sa. ²⁰ Ba totoño podalae vahesi pule nia, meke nabu sa bulona si tava rizu si asa koasa nana habohabotuana banara meke ta vagi palae sa nana tinolava. ²¹ Ta hadu taloa si asa koari na tie meke ta poni nia sa sa binalabala tadi na kurukuru pinomo; koa turani sa sari na don'ki pinomo meke hena duduli

guana bulumakao; meke sa tinina si tava boboso koari na puni pa mañauru, osolae helahelae nia sa sapu sa Tamasa Ululuna Hola si bañara ni sari na butubutu tadi na tie meke va bañaria Sa koa rini si asa pu hiva vizatia Sa.

²² Tumaeni mua sari doduru vivinei hire, ba agoi Belosaza, sa tuna, si lopu va pepekae pule nigo. ²³ Va turu pule nigo si agoi pude va karia sa Bañara pa Mañauru. Vagi goi sari na kapa qolo pa Nana Zelepade pude napo ni vaeni agoi meke sari mua koimata, sari loamu, meke sari mua barikaleqe pinausu. Vahesi goi sari na tamasa ta tavetedi pa qolo, siliva, boronizi, aeana, huda, meke patu, sapu lopu boka dodogorae, avavosae, meke balabala. Ba lopu hite va lavatia goi sa Tamasa pu tagoi sari doduru niniranira meke kopu nia Sa sa mua tinoa meke sari doduru mua tinavete. ²⁴ Gua asa ke garunu mae nia Sa sa lima sapu kuberena sa kinubekubere hie.

²⁵ Hiera gua si ta kubere:

‘NAE, NAE, PADA, PAQAHA.’

²⁶ Hie ginuadi sari zinama hire:

Nae: Ele nae i Tamasa sari rane sapu kote bañara si agoi meke ele va beto ia Sa. ²⁷ Pada: agoi si ele ta pada koari na sikele meke sapu lopu kamo a goi sa pada. ²⁸ Paqaha: Sa mua butubutu si ele ta paqaha meke ta poni la koari pa Media meke koari pa Pesia.”

²⁹ Meke pa ginarunu te Belosaza si tava poko pepolo se Daniela, meke tava paku seni qolo sa ruana, meke tava poni nia sa sa vina ñeta tuturuana ululuna koasa butubutu bañara.*

* 5:29 Zen 41:42

³⁰ Koasa boni tugo asa, si ta seke va mate se Belosaza sa baṇara pa Babiloni, ³¹ meke e Dariasi sa tie Media, si vagi hobena sa binaṇara koasa butubutu; onomo ṇavulu rua vuahenina si asa pa totoaso asa.

6

Daniela pa Korapa Pou Laione

¹ Dariasi si vizatia pude va turu i si ka keke gogoto hiokona puta tie pude qavuna nia sa doduruna sa nana butubutu baṇara, ² meke ka ṇeta koimata pude totoli ni sari kasa arini si vizati sa. Keke koari ka ṇeta si e Daniela. Sari na qavuna si kote olaṇa la koari ka ṇeta tie totoli pude va gorevura i sari na hiniva tanisa baṇara. ³ Ego, se Daniela si tavetavete va leana holani sari kasa koimata totoli meke sari na qavuna, koa gua koari nana binokaboka sapu noma hola, ke balabala sa baṇara pude va kopu nia koasa sa doduruna sa butubutu baṇara. ⁴ Ke podekia ri na qavuna meke ari koimata totoli pude hata nia sirana pude zutu ia. Ba pa nana tinavete si lopu boka ta zutu si asa, sina sa nana hahanana si tonoto meke ta ranena si asa; loke nana sinea babe kaiqa vasina si loposo nia sa. ⁵ Vina betona si zama si arini, “Lopu kote boka vagia gita si keke ginugua pude zutu ia se Daniela osolae vagia pa kaiqa ginugua la gua tu koasa tinarae tanisa nana Tamasa.”

⁶ Ke topue varigara la sari na qavuna na koimata totoli pude dogoria sa baṇara, meke zama, “Baṇara Dariasi, mu toa hola ninæ rane!

⁷ Gami na tie totoli, na qavuna meke sari na dia

tie varitokae, si ele va ego ia pude garunu nia agoi sa baṇara si keke tinarae sapu va nīnira ia sa binalabala sapu loke tie kote varavara la pa kaiqa tamasa pule koari ka tolonavulu puta rane sapu mae hire, ba koa agoi baṇara mo. Asa pu varavara la pa kaiqa tamasa si kote ta gona nuquru la pa pou lohina tadi na laione. ⁸ Ego, baṇara, mu garunia sa vina turu asa, mamu kubere gore nia pude lopu kote boka ta hobe gua sapu hoke ta tavete koari na tinarae tadi pa Media meke Pesia, sapu lopu boka ta hobe.” ⁹ Ke kubere gore nia e Dariasi sa baṇara sa tinarae.

¹⁰ Totoso tumae nia Daniela sapu ele ta tavete sa vina turu asa, si pule la pa nana vetu si asa meke sage la pa nana lose pa kali sage, vasina koa sari vuida sapu tukele la pa Zerusalemā. Neta totoso pa hopeke rane si kokotuṇu si asa meke varavara, zama leana la koasa nana Tamasa, gua mo sapu ele hoke tavetia sa doduru rane.

¹¹ Meke topue varigara la si ari kasa tie hire meke dogoria se Daniela korapa varavara meke tepa tinokae la koasa nana Tamasa. ¹² Ke la si arini koasa baṇara meke la nanasa nia sa nana vina turu: “Veā, lopu kuberia tu goi sa tinarae sapu koa ri ka tolonavulu puta rane sapu korapa mae si doduru tie kote varavara la koa goi mo, gua? Loke tie si kote varavara la pa kaiqa votiki tamasa babe na tie. Ura asa sapu lopu lulia sa tinarae, si kaqu ta gona nuquru la pa korapana sa pou lohina tadi na laione.”

Olana sa baṇara, “Uve, sa vina turu si asa tugo gua sapu ta tavete pa tinarae tadi Media meke

Pesia, sapu lopu kaqu ta hobe.”

¹³ Meke zama si arini koasa baṇara, “E Daniela, sapu keke arini pu ta raovo mae pa Ziuda, si lopu hite hiva va tabe igo sa si agoi baṇara, babe koasa vina turu sapu kubere gore nia goi. Korapa varavara neta totošo pa hopeke rane si asa.” ¹⁴ Totoso avosia sa baṇara sapu guahe, si talotaṇa hola si asa; meke sipu lopu ele lodu sa rimata si podeke sisigitia sa pude harupia se Daniela.

¹⁵ Meke ene varigara la sari kasa tie koasa baṇara meke zama la koa sa, “Mu va nonoga ia baṇara sapu koasa tinarae tadi pa Media meke Pesia si loke vina turu sapu tavetia sa baṇara si boka ta hobe.”

¹⁶ Ke vala nia sa baṇara sa zinama, meke turana vagia rini se Daniela meke gona la nia pa pou lohina tadi na laione. Meke zama sa baṇara koe Daniela, “Mani harupu igo sa mua Tamasa si agoi, Asa sapu nabulu nia goi doduru totošo!”

¹⁷ Keke patu si tava veko la pa nuzuna sa pou, meke tokoro la nia sa baṇara sa nana riṇi meke gua tugo sari riṇi tadi nana koimata, pude lopu kaqu boka ta harupu tugo se Daniela. ¹⁸ Meke pule sa baṇara koasa nana vetu baṇara, meke lopu henahena si asa koasa boṇi asa; loketona linopilopi va qetuqetu tie si ta evana tugo. Meke lopu boka puta si asa.

¹⁹ Koasa kalalasa kekenu pana vaqavaqasa, si tekulu sa baṇara meke bebeno la koasa pou tadi na laione. ²⁰ Totoso tata la tugo sa koasa pou tadi na laione, si kulusuna meke titioko la si asa koe Daniela, “Daniela, nabulu tanisa Tamasa

toana, vea, boka harupu igo sa mua Tamasa sapu vahesia goi doduru totofo, koari na laione?”

²¹ Olaña se Daniela, “Bañara, mamu toa hola ninae rane! ²² Garunu mae nia sa qua Tamasa sa Nana mateana meke kumuhi nuzudi sari na laione. Lopu hite garatau rini sina loke qua sinea si arau pa Kenuna Sa. Meke koa goi, bañara, ba loke kinaleana si ele tavetia rau pa kenumu.”

²³ Qetu hola sa bañara meke vala zinama pude ovulu vura nia se Daniela koasa pou. Meke totofo ta ovulu vura se Daniela si loke bakora si ta dogoro koa sa, sina rañea sa sa nana Tamasa.

²⁴ Pa ginarunu tanisa bañara si ta vagi saripu zutuna se Daniela meke ta gona nuquru la pa korapa pou tadina laione, turanae dia barikaleqe meke koburu. Sipu lopu ele kamo pa hatara si arini si horu vagi mo ari laione meke garata moku pani susuridi.

²⁵ Meke kubere la se Dariasi sa bañara koari doduru tie, na butubutu meke tie pa doduru vinekala pa doduruna sa popoa pepeso:

“Mi tagotago va noma!

²⁶ Na vina turu si vatu nia rau sapu pa doduru pinaqaha popoa pa qua butubutu bañara, doduru tie si kaqu matagutu nia meke pamaña nia sa Tamasa te Daniela.

Ura na Tamasa toana si Asa
meke koa hola ninae rane ka rane;
sa Nana butubutu bañara si lopu boka ta huara,
sa Nana binañara si lopu kaqu kokoi.

²⁷ Vari harupi si Asa meke vari tokae,

na vina gilagila si taveti Sa meke na tinavete
variva magasa pa mañauru meke pa
pepeso.

Asa harupia se Daniela

koari na ninirañira tadi na laione.”

²⁸ Ke ravutu se Daniela koari na binañara tadi
Dariasi meke Saerasi sa tie Pesia.

Tozi Vura ni Daniela sari Nana Dinogodogorae

7

7:1, 12:13

Pinutagita Kekenu te Daniela: Ka Made Kurukuru

¹ Koasa vuaheni kekenu sapu koa banara se
Belosaza pa Babiloni, si kamo si keke pinutagita
koe Daniela, meke dogoria sa si keke dinogodogo-
rae sipu korapa eko puta si asa pa nana teqe. Sa
vivinei koasa nana pinutagita si kubere gore nia
sa. ² Zama se Daniela: “Koasa qua pinutagita pa
boni asa si dono la si arau, meke isara pa kenuqu
rau sari ka made givusu pa mañauru korapa
hiru ia rini sa kolo lamana. ³ Meke vura mae
koasa kolo lamana si ka made kurukuru lavata,
hopeke votivotikaedi.* ⁴ Sapu kekenu si dono
guana laione meke sari tatapuruna si gua tadi na
atata. Kopu dono la si arau osolae ta daku palae
sari tatapuruna meke ta ovulu sage si asa koasa
pepeso pude turu koari karua nenena guana tie,
meke na bulo tie si ta poni nia sa.

⁵ Meke isana pa kenuqu sa kurukuru vina rua,
sapu dono guana bea. Turu ni sa sari nenena

* **7:3** Rev 13:1, 17:8

pa keke kali tinina si asa meke ka neta susuri raqaraqa si koa dia pa nuzuna, pa vari korapadi ri livona. Ta tozi si asa pude, 'Gasa turu mamu hena va soku masa gua sapu hiva nia goi!' gua.

⁶ Mudina asa, si dono la si arau, meke isana pa kenuqu si keke kurukuru pule sapu dono guana leopadi. Meke koa dia pa mudina sa si ka made tatapuru gugua tadi na kurukuru tapuru. Sa kurukuru hie si ka made batuna, meke ta poni nia sa sa niniranira pude koa banara.

⁷ Beto asa, koasa qua dinogodogorae pa boni asa si dono la si arau, meke isana pa kenuqu, si sa kurukuru vina made sapu dono hikare meke variva matagutuna meke ninirana hola. Na livo aeana nomadi si tanisa sapu huarani sa meke henani sa sarini pu va matei sa meke neti sa pa kauru nenena sarini pu koa hola. Na votikaena hola koari na kurukuru pu ele vura, meke koa dia koasa si ka manege puta kikiho. ⁸ Sipu korapa balabala i arau sari na kikiho hire, si vura nana pa kenuqu koasa kurukuru, si keke kikiho pule, na kikiho hitekena, sapu vura mae pa vari korapadi; meke ka neta ari na kikiho si ta rabutu vura pa kenuna sa. Sa kikiho hie si tago mata gugua tadi na tie meke na nuzu sapu vahesi pule.

Dogoria Daniela si Asa sapu Toa Hola Ninae Rane

⁹ Sipu korapa dono la si rau,
si sari na habohabotuana banara si ta veko
dia mo pa dia vasidi,
meke Asa Pu Koa Pukerane meke Ninae Rane
si vagia sa Nana habohabotuana.
Sari Nana poko si keoro guana sinou

meke sa kalu pa batuna si keoro gua tugo na kalu sipi.

Sa Nana habohabotuana si halalia na nika, meke doduru totopilina si hurunu beto.

¹⁰ Meke keke ovuku nika si totolo vura, vura mae gua pa Kenuna Sa.

Tina na tina si koa nabulu koa Sa; soku vuro tina va tata ia soku vuro tina si turu pa Kenuna Sa.

Habotu beto si arini koasa vinaripitui asa, meke ta tukele sari na buka.

¹¹ Na zama va titie lamo sa kikiho hitekena. Doño toto la mo si arau osolae tava mate sa kurukuru meke sa tinina si ta gona nuquru la pa korapa nika halalana. ¹² Sari ka neta kurukuru pule si tava malumu pude toa ba pa keke kukuru toতোসো মো, বা সারি দিয়া নিনিরানিরা সি তা বাগি পালৈ.

¹³ Pa korapana sa qua dinogodogorae pana boni si doño la si arau, meke turu nana pa kenuqu si keke sapu doño guana keke tuna na tie, pu luli mae koari na lei pa Mañauru. Ene la si Asa koa Sa pu koa pukerane meke ninae rane meke ta turana la si Asa pa kenuna Sa.

¹⁴ Na ta poni nia Sa, sa tinolava, meke nıniranira tanisa bınanara meke vahesia ri doduru tie na butubutu na tiedi ri doduru vinekala si Asa. Sa Nana binanara si koa hola ninae rane meke loke kokoina. Sa butubutu banara Tanisa si lopu kaqu ta huara.”

Ta Rupaha sa Pinutagita

¹⁵ “Arau, Daniela si tasuna pa maqomaqoqu, na matagutu nia rau sa pinutagita sapu dogoria rau. ¹⁶ La si arau koasa keke ri pu turudi vasina meke nanasa nia sa ginuadi ri doduru hire.

Ke tozi nau sa meke rupaha mae nia sa:
¹⁷ zama si asa, ‘Sari ka made kurukuru lavata
hire si ka made butubutu baṇara sapu kote turu
vura pa popoa pepeso. ¹⁸ Ba sari pu tava madidi
koa Sa pu Ululuna Hola si kote ta poni nia sa
butubutu baṇara meke kote tagoa rini ninae
rane ka rane.’

¹⁹ Meke hiva tumae nia rau sa ginuana hi-
nokara sa vina made kurukuru lavata, sapu
votikaena hola koari doduru meke variwa
matagutuna hola koari nana livo aeana meke
kakarutu boronizi. Sa kurukuru lavata asa si
huari meke gani sari tie, meke neti naperi sari
pu koa hola. ²⁰ Meke hiva tumae nia tugo rau
sa guguadi ri ka manege puta kikiho pa batuna,
meke sa keke kikiho sapu vura sage mumudi,
sapu va hoqa pani sari ka ṇeta kikiho, sa kikiho
sapu turu vura koari kasa meke tago mata meke
ṇuzu sapu vahesi pulenia. ²¹ Sipu korapa doṇo
toto la arau, si varipera la koari na tie madidi te
Tamasa sa kikiho asa meke va kilasi sa, ²² osolae
kamo mae si Asa pu Koa Pukerane meke Ninae
Rane meke vari pitui ni meke toka ni Sa sari tie
madidi Tanisa sapu Ululuna Hola, meke tagoa ri
tie madidi Tanisa sa butubutu baṇara.

²³ Va mae ia sa koa rau sa vina bakala hie: ‘Sa
kurukuru vina made si na vina made butubutu
baṇara sapu kote turu vura pa popoa pepeso.
Kote votikaena si asa koari doduru butubutu
baṇara meke kote va kilasia sa sa doduruna
sa popoa pepeso; kote neti gore va kaleana ia
sa. ²⁴ Sari ka manege puta kikiho si ka manege
puta baṇara sapu kote vura mae koasa butubutu
baṇara hie. Mudi dia rini si kote keke baṇara

pule si kote vura mae, kote votikaena si asa koa rini pu mae kekenu; kote va gore pani sa si ka neta banara. ²⁵ Kote va karikari la ia sa sa Tamasa Ululuna Hola meke nonovali sari tie madidi Tanisa meke podekia sa pūde hobei sari na totošo na tinarae sapu ele tava turudi. Sari na tie madidi si kote tava ade la koa sa, koari ka neta vuaheni kukuruna.

²⁶ Ba sa vinari pitui si kote ta evaṇa meke sa nana niniraṇira si kote ta vagi palae meke ta huara palae. ²⁷ Meke sa binaṇara, niniraṇira, meke linavata koari na butubutu banara pa kauruna sa doduruna sa maṇauru si kote ta ade karovo la koa ri na tie ta madidi, sari tie Tanisa sapu Ululuna Hola. Sa Nana butubutu banara si kote na butubutu banara sapu kote koa hola ninae rane, meke doduru banara si kote vahesia meke va taḃe ia.’

²⁸ Tani beto sa vivinei. Arau, Daniela si tasuna sisigiti koari qua binalabala, meke hobe va kaleana sa isumataqu na matagutu va hola, ba kopuni mo arau si hire meke lopu tozi rau lamae.”

8

Dogoro Sipi Kokoreo meke na Qoti se Daniela pa Nana Dinogodogorae

¹ Pa viṇa neta vuahenina sa binaṇara te Belosaza si dogoria arau, Daniela, si keke dinogodogorae mudina sapu keke sapu ele dogoria rau. ² Koasa qua dinogodogorae si dogoro pule nau si arau pa korapana sa vasileana ta gobana pa Susa, pa pinaqaha popoa pa Elami; pa korapana sa dinogodogorae si koa qua si arau pa

taqelena sa Tototolo Ulai, na kolo ta paza vagina pa ovuku. ³ Doño sage si arau meke koa nana pa kenuqu si keke sipi kokoreo sapu karua kikihona, turu nana pa taqelena sa tototolo, meke sari kikihona si gele. Keke ri kikihona si gele hola nia si keke ba toqolo mumudi maena mo. ⁴ Kopu dono la si arau totošo haqala totoro la si asa pa kali lodu rimata, meke la pa kali matao meke pa kali gede. Loke kurukuru name boka turu va tia ia, meke lopu keke si boka la variharupi koasa niniranira tanisa sipi kokoreo. Gua sapu hiva tavetia sa si tavetia mo sa meke ta evanae noma ninira hola si asa.

⁵ Sipu korapa balabala va gele ia rau si hie, si vura va hodaka pa kali lodu rimata si keke qoti sapu noma va leana kikihona pa vari kokorapadi ri matana. Tuturei hola karovia sa sa popoa pepeso ba lopu hite tiqulaia sa sa popoa pepeso.

⁶ Tia mae ia sa sa sipi kokoreo, karua kikihona hie, sapu dogoria rau turu nana pa kali taqele meke ta nazirina toa meke totoro mae ia sa.

⁷ Dogoria rau sapu raza va kaleana ia sa sa sipi kokoreo, seke ia sa meke huara pani sa sari karua kikihona. Lopu garo sa sipi kokoreo, lopu boka raza hobena; la sa qoti meke seke gore nia pa pepeso meke neti ia sa, meke lopu keke si boka la harupu ia sa sipi kokoreo pa niniranira tanisa qoti.

⁸ Nomana sa niniranira tanisa qoti ba pa korapana sa totošo sapu ninira hola si asa si moku palae sa nana kikiho nomana, meke pa nana lolomo si vura mae si ka made kikiho nomadi sapu toqolo sage la koari ka made givusuna sa

mañauru. ⁹ Vura mae koasa keke ari na kikiho si keke kikiho pule, sapu podalae va hiteke ba toqolo pa ninirañira, la gua pa kali matao meke hola la pa kali gasa rimata meke la gua koasa Popoa Leleana*. ¹⁰ Noma la tu si asa osolae kamo la ia sa sa qeto minate pa mañauru, meke gona gore ni sa pa pepeso sari kaiqa ri qeto pinopino meke neti gore ni sa.* ¹¹ Va turu pule nia si asa pude noma gugua sa Koburu Tavia tanisa qeto minate pa mañauru; vagi pani sa sari na vinukivukihi sapu ta tavete doduru rane la koa Sa, meke sa Nana Zelepade si tava boni. ¹² Koa gua koasa vinaripera tanisa kikiho hitekena*, si sa puku tie madidi meke sa vinukivukihi sapu ta tavete doduru rane si ta hukata. Bokaboka si asa pa doduru tinìtona sapu tavetia sa, meke sa hinokara si ta gona la pa pepeso.

¹³ Meke avosia rau zamana si keke tie hopena, meke keke pule si zama la guahe koa sa, “Vea seunae gua meke kote tava gorevura sa dino-godogorae hie, sapu sa dinogodogorae tanisa vinukivukihi doduru rane, sa tinavete sea sapu va bonina sa vasina hopena meke sa puku tie madidi sapu kote ta neti pa kauru nene?”

¹⁴ Zama si asa koa rau, “Kote vagi karua tina neta gogoto veluvelu meke munumunu totooso sapu lopu kote ta tavete sari na vinukivukihi; hola sapu asa si kote tava madi pule sa Zelepade,” gua si asa.

* **8:9** Sa Popoa Leleana si sa Popoa Izireli. * **8:10** Rev 12:4

* **8:12** Sa vinaripera tanisa kikiho hitekena babe sari sinea tadi na tie madidi.

Rupahia e Qebireli, sa Mateana, sa Pinutagita

¹⁵ Sipu korapa doño la si rau koasa dinogodogorae meke korapa podekia pude tumae nia, si turu nana pa kenuqu si keke sapu doño guana tie. ¹⁶ Meke avosia rau si keke mamalaini tie, korapa titioko mae gua pa Tototolo Ulai sapu zama, “Qebireli, tozi nia sa gugwana sa dinogodogorae koasa tie hie,” gua.*

¹⁷ Totoso ene mae si asa koasa vasina sapu turu arau, si matagutu si arau meke hoqa oporapaha gore pa pepeso. “Tuna na tie,” gua si asa koa rau, “mamu tumae nia sapu sa dinogodogorae si gugwana sa vina hokotodi rina tooso kaleadi arini,” gua.

¹⁸ Sipu korapa zama mae si asa koa rau, si ele mabubulu tu si arau, sa isumataqu si pa pepeso. Tiqu mae au sa meke ovulu sage nau sa pa nenequ.

¹⁹ Zama si asa, “Kote tozi nigo rau sapu nasa si kote ta evana pa korapana sa tooso sapu ta naziri sa Tamasa, sina sa dinogodogorae si gugwana sa tooso ta vizatana pa vina betona sa tooso. ²⁰ Sa sipi kokoreo sapu karua kikihona sapu dogoria goi, si arini sari karua banara pa Media meke pa Pesia. ²¹ Sa qoti sapu puki kaluna, si asa sa banara pa Qurisi, meke sa kikiho nomana pa vari korapadi ri matana, si asa sa banara kekenu. ²² Sari ka made kikiho sapu hobena sa keke sapu ele moku taloa si sari ka made butubutu banara sapu kote vura sage koasa keke butubutu kekenu, ba lopu kote ninira gua sa butubutu asa si arini.

* **8:16** Lk 1:19,26

²³ Koasa totoſo pa vina betona ſa dia binaṇara, totoſo ſapu ele kaleadi hola ſi arini, ſi kote vura mae ſi keke baṇara ſapu doṇo va bubugorae iſumatana, meke bokabokana hola pa ſekesekei.

²⁴ Kote ta evaṇae na baṇara ninirana hola ſi aſa, ba lopu pa nana niniraṇira ſoti. Kote huhuara va noma hola ſi aſa meke bokaboka pa doduru tinitoṇa ſapu taveti ſa. Sari tie niniradi meke tie madidi te Tamasa ſi kote va kilasa betoi ſa. ²⁵ Na ſinekesekei ſi kote tavetavete nia ſa pude bokaboka, meke kote vahesi pulenia pa bulona ſi aſa. Totoſo koa va leana ſari tie ſi kote huara paṇi ſa, meke kote turu va tia ia ſa ſa Baṇara tadi na baṇara. Ba kote ta ſeke huara ſi aſa, ba lopu pa niniraṇira tana tie.

²⁶ Sa dinogodogoraedi rina vinukivukihi pana munumunu meke veluvelu ſapu ta poni nia goi ſi hinokara, ba tome ia, lopu vivinei nia, ura kote ſeunae hola meke kote gorevura ſa ginuguana ſa.”

²⁷ Arau, Daniela, ſi malohoro meke koa moho ſi rau ka viſaviſa rane. Beto ſi tekulu ſage ſi arau meke va tana qua koari na tinavete tanisa baṇara. Pupuhu ſiſigiti nia rau ſa dinogodogorae; na taſuna hola pude gilania ſa guguaṇa.

9

Varavara Tokani Daniela ſari na Tie Ziu

¹ Pa vuaḥeni kekenu te Dariasi, tuna koreo e Zekisi, ſa tie pa Media, ſapu tava baṇara koasa butubutu baṇara pa Babiloni, ² ſi arau, Daniela, ſi gilania koasa tinirona ſa Kinubekubere Hope ſapu zama nia Tamasa koe Zeremaea ſa poropita, ſapu kote koa ta huara eko mo ſa popoa

Zerusalema ka zuapa navulu puta vuaheni.*

³ Ke varavara va ninira la si rau koe Zihova sa Baṇara, tepa sisigiti la koa Sa pa vinaravara, madi pa ginani, meke va sage poko baika meke habotu pa eba si rau. ⁴ Varavara la si rau koe Zihova sa qua Tamasa meke helahelae:

“Kei Zihova, Agoi sa Tamasa lavata sapu variva magasana, sapu kopu nia sa Mua vinariva egoi pude tataruni sarini pu va tabei sari Mua ginarunu, ⁵ gami si ele sea meke tavete va kaleana. Ele va karikari atu koa Goi; ele taliri taloa si gami koari na Mua ginarunu meke tinarae. ⁶ Lopu hite va avoso la si gami koari na Mua nabulu, sari na poropita, sapu zama pa Pozamu koari mami baṇara, mami koburu tavia, sari tamamami, meke koari doduru tienā sa pepeso.

⁷ Baṇara, Agoi si toṇoto, ba koasa rane hie si nobi gami na kinurekure si gami na tie pa Ziuda meke tienā sa vasileana Zerusalema meke pa doduruna sa butubutu Izireli, ari pa seu na tata, meke koari doduru popoa pu ta hurakatae lani gami Goi sina lopu luli Igo gami si Agoi. ⁸ Zihova, gami meke sari mami baṇara, mami koburu tavia meke sari tamamami si nobi gami na kinurekure sina ele va sea atu si gami koa Goi. ⁹ Agoi mami Baṇara mami Tamasa si tataru meke variva taleosae, be vegua va karikari atu gua koa Goi si gami; ¹⁰ lopu hite va tabe igo gami si Agoi Zihova mami Tamasa, babe kopuni sari na Mua tinarae sapu va mae i ri Mua nabulu,

* 9:2 Zer 25:11, 29:10

na poropita. ¹¹ Doduru pa Izireli si ele sekei sari Mua tinarae, meke taliri taloa, korodia va tabe Igo.

Gua ke sari lineveleve meke sari vinilasa ta tokorodi koari na vinari pitui meke ta kuberedi koasa tinarae te Mosese, sa nabulu te Tamasa, si ele ta zoropo vura mae koa gami sina ele va sea atu si gami koa Goi. ¹² Ele va gorevura i Agoi sari zinama sapu ta zamani gami meke sari mami banara koari na tinasuna nomadi sapu va razani gami Goi. Pa kauruna sa doduruna sa manauru si loketona gugua sapu ta tavete la pa Zeruselema si ele ta evana. ¹³ Gua mo sapu ta kubere pa Tinarae te Mosese, sari doduru vina kilasa si ele kamo koa gami, ba lopu hite taliri tu si gami koari mami sinea meke hata ia sa tataru na tinaleosae te Zihova mami Tamasa meke kopuni sari Mua zinama hinokaradi. ¹⁴ Lopu aqa hokara si Agoi Zihova pude va razani gami sari na tinasuna, sina Agoi Zihova mami Tamasa si tonoto pa doduru tinitoa sapu taveti Goi; gua ba lopu hite va tabe igo gami si Goi.

¹⁵ Kamahire, Tamasa mami Banara, Agoi pu turana vurani sari Mua tie pa Izipi koasa Mua niniranira meke Agoi pu vata dogoro nia sa Pozamu telemu sapu koa hola kamo pa rane ninoroi, gami si ele sea, gami si ele tavete va kaleana. ¹⁶ Kei Banara, gua sapu taveti Agoi koari doduru Mua tinavete tonotodi, si Mu va taliri taloa ia sa Mua binugoro meke tinanaziri pa Zeruselema, sa Mua vasileana lavata, sa Mua togere hopena. Sa Zeruselema meke sari

Mua tinoni si na vina sisireina kamahire tadi na tie pu koa vari likohaeni gami koa gua koari mami sinea meke sari mami tinavete kaleadi meke tadi na tamamami.

¹⁷ Ego, mami Tamasa, Mu avosi sari vinaravara na tinepatepa tanisa Mua nabulu. Pa laemu Goi, Baṇara, si Mu doṇo la pa tataru koasa Mua Zelepade ta huarana. ¹⁸ Va taliṇa mae, Tamasa. Mamu va avoso; tukeli Matamu, Mamu dogoria sa tinahuara tanisa vasileana lavata vasina sapu tavahesi sa Pozamu visoroihe. Lopu tepatepa atu si gami koa Goi sina toṇoto mami, ba na koa gua tu koasa Mua tataru variva taleosae. ¹⁹ Kei Baṇara, va avoso! Baṇara taleosoni gami! Baṇara va taliṇa mae, Mamu tavetavete! Pa laemu Goi, qua Tamasa, si Mu lopu va sasanae, sina sa Mua vasileana lavata meke Mua tinoni si ta poza nia sa Pozamu.”

Va Bakalia Qebireli sa Kinorokorotae

²⁰ Sipu korapa zamazama si arau meke varavara, helahelae ni sari qua sinea meke gua tugo tadi na tinoni pa Izireli meke tepatepa la koe Zihova sa qua Tamasa pude kuri pulea sa Zelepade pa Zerusalema, ²¹ si tuturei tapuru kamo mae koa rau se Qebireli, sa tie sapu dogoria rau pa keke qua dinogodogorae visoroihe. Na totošo vukivukihi veluvelu sa totošo asa.* ²² Zama si asa koa rau, “Daniela, mae si arau pude poni igo ginilagilana meke va dodogorae igo. ²³ Sipu podalae varavara tugo agoi, si ta poni nia mo goi sa inolana, asa sapu mae nia arau pude tozi nigo,

* **9:21** Lk 1:19,26

ura na agoi si ta pama^{na}emu hola koe Tamasa. Gua ke mu vilitia sa inavoso, mamu va bakalia sa dinogodogorae:

²⁴ Keke to^{to}so gelena sapu zuapa to^{to}so ka zuapa ^{na}vu^{lu} puta vuaheni si tava ego pude ta leosae sari na sinea meke ta vulasa palae sari kinaleana tadi mua tinoni meke tanisa vasileana pa Zerusalema pude va kamo ia sa tinonoto sapu koa hola, pude va gorevura i sari dinogodogorae meke kinorokorotae meke pude va madi ia sa Zelepade Hopena.

²⁵ Mu tumae nia mamu va bakalia si hie: Podalae pa to^{to}so sapu to^{zi} vura nia sa poropita pude kuri pule ia sa popoa Zerusalema, osolae kamo pa to^{to}so sapu mae sa Ba^{na}ra ta po^{zae} Mesaea*, si kote pa ka zuapa to^{to}so pa zuapa vuaheni (asa sa made ^{na}vu^{lu} sia vuaheni) meke kote hoda la kamo pa ka onomo ^{na}vu^{lu} rua to^{to}so pa zuapa vuaheni pule, (asa si made gogoto tolon^{na}vu^{lu} made vuaheni). Kote kuri pulea rini sa popoa Zerusalema, meke sari na sirana pa korapana meke sari na vetu hakehakei niniradi, ba kote na to^{to}so tasunadi si arini.

²⁶ Mudina sa onomo ^{na}vu^{lu} rua to^{to}so pa zuapa vuaheni sana, sa Ba^{na}ra ta po^{zae} Mesaea si kote tava mate meke kote gua sapu loketona tu kote tagoa si Asa. Sa qeto minate tana keke ^{na}ti ba^{na}ra si kote mae huara ia sa vasileana lavata meke sa Zelepade. Sa vina betobeto si kote kamo guana naqe: Na vinaripera si kote nono lamo

* **9:25** Sa Ba^{na}ra ta po^{zae} Mesaea si ta po^{zae} Karisito koa ri na Kinubekubere Hope Vaqura. Sa Hiburu si zama “asa sapu ta zoropae oela” meke ta vizatana koe Tamasa.

osolae kamo sa vina betobeto, ura sa tinahuara si ele ta korotaena. ²⁷ Sa banara hie si kote tavetia si keke vinariva egoi koari soku tie pa zuapa vuaheni. Pa korapana sa zuapa vuaheni asa si kote va noso pani sa sari na vinukivukihi na vinariponi la koe Tamasa. Meke pa keke vasina ululuna pa Zelepade si kote va turu ia sa si keke beku variva malederena sapu vata kamo tinahuara pa popoa, meke kote koa vasina si asa osolae hokoto sa vina gorevurana sapu ta korotae sapu kote tava kamo la koa sa tie* pu va turu ia sa beku.”*

10

Sa Dinogodogorae te Daniela pa Ovuku Taeqarisi

¹ Pa vuahenina vina neta koasa binanara te Saerasi pa Pesia, si ta poni nia e Daniela sapu ta pozae Belotesaza si keke dinogodogorae. Sa inavoso tanisa si hinokara meke keke vinaripera nomana hola si guni nia sa. Sa vina bakala koasa inavoso si kamo la koa sa pa keke dinogodogorae.

² Koari ka neta vuiki si koa kulusu si arau, Daniela. ³ Lopu hena ginani arileadi si arau; sari beruqu si lopu tiqu la pa masa kurukuru babe pa vaeni; meke lopu lumulumu si arau osolae hola sari ka neta vuiki.

⁴ Koasa rane vina hiokona made pa sidara kekenu pa vuaheni asa, sipu korapa turu qua pa taqelena sa ovuku lavata pa Taeqarisi^d, ⁵ si dono sage si arau meke turu nana pa kenuqu

* **9:27** Sa tie pu va turu ia babe sa vasilyana. **9:27** Dan 11:31, 12:11; Mt 24:15; Mk 13:14

* **9:27** Dan

si keke tie sapu pokopoko lineni, sapu va sagea nana pa kopetena si keke belete sapu ta tavetena pa golo viana.* ⁶ Sa tinina si guana patu nedala, sa isumatana si guana kapi, sari matana si guana zuke hurunudi, sari limana meke nenena si guana boronizi nedalana, meke sa mamalainina si guana mamalaini tadi na kobi tinoni.

⁷ Arau, Daniela eke mo telequ dogoria sa dinogodogorae; saripu koa turañau lopu dogoria si asa, ba kamo va hodaki na minatagutu ke govete meke la tome si arini. ⁸ Ke koa eke telequ si arau, meke dono toto eko ia mo arau sa dinogodogorae variva magasana; loke ninirañira si koa koa rau, sa isumataqu si iliri guana tie matena meke malohoro va kaleana si arau. ⁹ Meke avosia rau sa zamana sa, meke sipu va avoso la si arau koa sa, si hoqa gore si arau meke puta, sa isumataqu si tia gore la pa pepeso.

¹⁰ Tiqu mae au keke lima si arau meke podalae neneqara sari limaqu meke tunutunuqu.

¹¹ Zama si asa, “Daniela, agoi sapu arilaemu hola koe Tamasa, avoso va leana mae i sari zinama sapu kote zama atuni arau koa goi, mamu turu sage sina koa goi si ta garunu mae si arau.” Meke sipu zama mae gua si asa koa rau si neneqaraqu meke turu sage si arau.

¹² Meke zama pule si asa, “Daniela, mu lopu matagutu. Podalae koasa rane kekenu sapu balabala vekoa goi pude vagi ginilagilana meke va pepekae pule nigo pa Kenuna sa Tamasa, si ta avoso sari mua vinaravara, meke pa inolandi rini si mae si arau. ¹³ Ba sa mateana kaleana

* **10:5** Rev 1:13-15, 2:18, 19:12

sapu nati hiniva nia sa butubutu banara pa Pesia si hukatau koari ka hiokona eke rane. Meke mae se Maekolo, keke ri nati mateana, meke toka nau, sina arau eke mo si koa vasina pude varipera koasa mateana kopu pa Pesia.* ¹⁴ Ego, mae si arau pude va bakalia koa goi sapu kote ta evana koari mua tinoni pa vugo na repere, sina sa dinogodogorae si pa guguana sa totošo sapu kote mae vugo repere.”

¹⁵ Sipu korapa zama mae ni sa mateana si gua hire koa rau, si va todoño ia rau sa isumataqu la pa pepeso meke lopu boka zama. ¹⁶ Meke qaqaama mae si asa sapu dono guana tie meke tiqúi sa beruqu, meke tukele ia rau sa nuzuqu meke podalae zama. Zama si arau koa sa sapu turu pa kenuqu, “Qua banara, malohoro nia rau sa dinogodogorae hie, meke lopu boka beto neneqara. ¹⁷ Qua banara, vea meke kote boka zama si arau, sa mua nabulu, koa goi? Loke qua niniranira si arau meke lopu boka siño va leana.”

¹⁸ Meke tiqu pule au sa sapu dono guana tie meke ninira pule si rau. ¹⁹ Zama si asa, “Agoi sa tie sapu arilaemu koe Tamasa, mu lopu matagutu,” gua si asa. “Bule! Mu mataqara. Mu va ninirae,” gua si asa.

Totošo zama mae gua si asa koa rau si ninira pule si arau meke zama, “Qua Banara, zama mae, sina agoi poni nau sa niniranira.”

²⁰ Ke zama si asa, “Tumae nia goi vea ke mae si arau koa goi? Lopu seunae meke kote pule la si arau pude raza ia sa mateana pu kopu nia sa

* **10:13** Rev 12:7

binaṇara pa Pesia, meke pana taloa arau vasina si kote mae sa mateana pu kopu nia sa binaṇara pa Qurisi; ²¹ ba kekenu si maqu tozi nigo sapu nasa si ta kubere pa korapana sa Buka tanisa Hinokara. Loke tie zuka au si arau koa ri na mateana kopu ba e Maekolo mo, sa mua mateana kopu.

11

¹ Meke koasa vuaheni kekenu sapu koa baṇara se Dariasi, sa tie pa Media, si turu pa kalina Maekolo si arau meke zuka ia meke lavelave nia rau si asa.

Sari Baṇara pa Kali Matao meke pa Kali Gede

² Ego, kamahire maqu tozi va hinokara nigo: Ka neta baṇara si kote vura mae gua pa Pesia, meke sa vina made si kote vura mae sapu tagotago holani sari doduru. Totoso vagia sa sa niniranira koasa nana tinagotago, si kote va gevuru i sa sari doduru pude kana ia sa binaṇara pa Qurisi. ³ Meke kote vura mae si keke baṇara ninirana sapu kote baṇara ni sa pa niniranira nomana meke tavetia gua sapu hiva nia mo sa. ⁴ Mudina sapu vura mae si asa, si sa nana butubutu baṇara si kote vari paqahi meke ta hia made la koari ka made givusu. Lopu kote la koari na tutina, babe kote tago ia rini pu hobena sa niniranira sapu tanisa, sina sa nana binaṇara si kote ta rabutu sage meke ta poni la koari kaiqa tu.

⁵ Sa baṇara pa kali matao si kote ninirana, ba keke ari nana palabatu varipera si kote ninirana hola la tu meke kote baṇara nia sa sa nana

butubutu baṇara telena pa ninira lavata.
⁶ Hola kaiḡa vuaheni si kote baere si arini. Sa tuna vineki sa baṇara pa kali matao si kote la koasa baṇara pa kali gede pude haba ia meke tavetia si keke vinariva egoi, ba sa ninira tanisa vinariva egoi hie si lopu kote koa seunae meke sa ninira tanisa baṇara pa kali gede ba lopu kote koa hola. Koari rane arini si kote va matea ri na kana sa vineki, sa tamana, sari na nabulu pu luli koa sa, meke arini pu zukana sa.

⁷ Ba keke arini pa tuti tanisa vineki si kote turu sage meke vagi hobe ia sa nana tuturuana binara. Asa kote raza ia sa qeto minate tanisa baṇara pa kali gede* meke nuquru koasa nana vasileana ta gobana; kote raza ia sa meke va kilasia sa. ⁸ Kote zau vagi tugo sa sari dia tamasa, dia beku ta tavetedi pa aeana meke sari dia likakalae arilaedi sapu ta tavetedi pa qolo meke siliva meke paleke taloa lani pa Izipi. Meke pa kaiḡa vuaheni si kote lopu voriti pule la ia sa sa baṇara pa kali gede. ⁹ Beto si kote la rapata pa Izipi sa baṇara pa kali gede ba si kote pule la nana pa nana popoa soti.

¹⁰ Ba sari tuna sa baṇara pa kali gede si kote varigara nia si keke qeto minate lavata, sapu kote qeto la guana keke naqe meke la rapata kamo latu koari na vasileana ta gobadi tadi dia kana.

¹¹ Meke kote ta naziri sa baṇara pa kali matao meke qeto vura la meke raza ia sa baṇara pa kali gede, sapu kote varigara nia si keke qeto

* **11:7** Kali gede be tia la pa kali gasa rimata.

minate lavata, ba sapu kote tava kilasa mo si asa. ¹² Totoso ta vagi taloa sa qeto minate asa, si kote siñi ia na vinahesi pule sa bañara pa kali matao meke kote va mate i sa sari soku tina ari nana kana, ba lopu kote koa va mataqara seunae si asa. ¹³ Sina sa bañara pa kali gede si kote varigara pule nia si keke qeto minate lavata pule, hola nia sapu kekenuna; meke hola kaiqa vuaheni si kote topue vura si asa meke sa qeto minate lavata, hopeke paleke va leana tiñitona varipera.

¹⁴ Koari na totoso arini, soku tie si kote kana la ia sa bañara pa kali matao. Sari tie varipera koari na mua butubutu Izireli si kote la raza ia tugo si asa, pude va gorevura ia tugo sa dinogodogorae, ba kote lopu boka si arini.

¹⁵ Meke kote qeto mae sa bañara pa kali gede* meke tomotomo lania sa pepeso pa kali goba pude haele nuquru pa korapana sa vasileana lavata ta gobana meke tuqe vagia. Sari qeto minate tadi pa kali matao si lopu kote garo pude va noso ia; sari dia puku tie varipera bokabokadi ba kote lopu boka turu va tia ia si asa. ¹⁶ Sa bañara pa kali gede si kote tavetia gua sapu hiva tavetia sa; loke tie kote boka raza ia. Kote sokirae pule nia si asa koasa Popoa Tolavaena meke kote tagoa sa sa niniranira pude huara ia.

¹⁷ Kote podekia sa pude turana mae nia sa doduruna sa niniranira tanisa nana butubutu bañara meke kote tavetia sa si keke vinariva egoi koasa bañara pa kali matao. Meke kote vala nia

* **11:15** Kali gede be tia la pa kali gasa rimata.

sa sa tuna vineki pude haba ia sa banara pa kali matao pude va hoqa ia sa nana butubutu banara, gua, ba sa binalabala tomena asa si lopu boka gorevura. ¹⁸ Beto si kote taliri si asa meke rapati sa sari na popoa koasa raratana meke kote soku si vagi sa, ba keke koimata pa keke popoa seuna kote va noso ia sa nana vinahesi pule meke tavetavete nia sa nana vinahesi pule pude va kilasa ia. ¹⁹ Mudina asa si kote kekere pule la si asa koari nana vasileana ta gobadi pa nana popoa, ba kote ta tubarae nia meke hoqa, meke lopu ta dogoro pule hokara.

²⁰ Sa tie sapu banara hobena si kote garunu la tie pude vagi takisi koari na tiena sa butubutu pude va ninira ia sa tinolava tanisa binanara. Ba hola kaiqa vuaheni si kote tava mate si asa, lopu pa kinukiti babe pa vinaripera.

Sa Banara Kaleana pa Kali Gede

²¹ Kote ta hobe si asa pa binanara koasa keke tie kaleana sapu lopu podo maena pa tuti banara. Kote saputu vagi ia sa sa binanara totooso lopu va nonoga sari tie, meke kote vagi ia sa pa sinekesekei. ²² Keke qeto minate lavata si kote va kilasa ia sa; meke kote tava mate tugo si keke nati hiama kenukenue. ²³ Beto tavetia sa si keke vinariva egoi koari votiki butubutu, si hoke kokoha i pule sa. Gua meke ninira nono la si asa, ba hitekena mo sa nana butubutu banara. ²⁴ Totoso koa muliunu sari na pinaqaha popoa tagotagodi si kote rapati sa si arini meke kote bokaboka si asa, holani gua sapu ele boka i ri tamana meke tamadia ri na tamana. Sari na

vinagi pa vinaripera meke sari na likakalae sapu hikoī sa, meke tinagotago sapu zau vagi sa si kote hia lani sa koa rini pu zukana si asa. Kote taveti sa sari binalabala pude rapati sari na vasileana ta gobadi, ba sa nana totoſo si kote tata kamo.

²⁵ Na qeto minate lavata si varigara nia sa, ke kote kepoto si asa pude raza ia sa baṇara pa kali matao. Sa baṇara pa kali matao si kote vura la tugo pude varipera sina nomana meke ninirana hola sa nana qeto minate, ba lopu kote boka si asa, na ari kaiqa na kote qoraqora nia si asa. ²⁶ Arini mo sapu henahena pa tavolo tanisa baṇara si kote va hoqana si asa; sa nana qeto minate si kote eoṇo, na soku si kote mate pa vinaripera. ²⁷ Sari karua baṇara si kote habotu pa keke tavolo meke vari kohai; na sari dia hiniva tomedi si koleanadi. Loketoṇa si kote boka variva egoi nia ri karua sina sa vīna betona si kote kamo pa nana totoſo. ²⁸ Sa baṇara pa kali gede si kote palekia sa sa nana tinagotago nomana meke pule pa nana popoa, ba sa hiniva ninirana pa bulona si pude huara ia sa Vinariva Egoi Hopena te Tamasa. Kote tavete la nia sa gua sapu hiva tavetia sa, beto si kote pule la nana pa nana popoa.

²⁹ Pa totoſo ta mutina si kote la rapata pule si asa koasa butubutu baṇara pa kali matao, ba kamahire si lopu kote gugua totoſo la he si kote ta evaṇa. ³⁰ Sari vaka pa kali lodu rimata koasa raratana si kote raza ia si asa, meke kote matagutu si asa. Ke kote kekere si asa meke va gore la nia sa sa nana tinanaziri koa sa Vinariva Egoi Hopena te Tamasa. Kote pule la

vasina meke tokani sa si arini pu luara pania sa Vinariva Egoi te Tamasa.

³¹ Sa nana geto minate si kote la va boni ia sa Zelepade meke va noso i sari vinukivukihi ta tavete pa hopeke rane. Kote va turu ia sa si keke beku variva malederena sapu vata kamo sa tinahuara nomana.* ³² Koari na zinama lomolomosodi si kote vagi karovi sa sari tie Ziu sapu ele sekea sa Vinariva Egoi, ba arini pu gilania sa dia Tamasa si kote soto va nabu koa sa vinahesina Sa. ³³ Sarini pu gilae si kote va tumatumae i sari sokudi, ba pa totooso hite si kote hoqa si arini koasa vedara, babe ta sulu pa nika, babe ta veko pa vetu varipusi, babe ta hiko sari dia likakalae. ³⁴ Pa totooso sapu tava kilasa si arini si lopu kote kamo la sari tinokae, ba soku sapu somana koarini si lopu kote pa hinokara. ³⁵ Kaiqa ari tie gilaedi si kote ta tubarae ni, pude di tava via, noño, meke loke bonidi osolae kamo sa totooso tava gorevura sa kinorokorotae, ura na kote kamo mae sia pa nana totooso ta mutina.

³⁶ Kote taveti sa banara gua sapu hiva taveti sa. Kote va ululu meke va lavata pule nia si asa, ululu holani sari doduru tamasa, meke kote zamani sa sari kaiqa zinama, sapu lopu hoke ta avosodi, la koasa Tamasa tadi na tamasa. Kote bokaboka si asa osolae tava kilasa si asa koasa binugoro te Tamasa, ura sari ginugua pu tava egodi si kaqu tava gorevura.* ³⁷ Lopu kote galagala ni sa sari tamasa tadi na tamana babe gua sapu hiva nia ari na barikaleqe, babe sari

* **11:31** Dan 9:27, 12:11; Mt 24:15; Mk 13:14 * **11:36** 2 Tes 2:3-4; Rev 13:5-6

kaiqa tamasa pule, na telenā mo va lavata pule nia si asa, hola ni sari doduru pule. ³⁸ Ba, kote va lavatia sa sa tamasa tadi na goba vasileana; keke tamasa sapu lopu ta gilanana koari na tamana. Kote va lavata nia qolo, siliva, meke na patu arilaedi sa meke na vinariponi sapu noma laedi. ³⁹ Kote rapati sa sari na vasileana ta gobadi sapu niniradi hola koasa tinokae tanisa keke tamasa karovona, meke kote va arilaena i sa sarini pu va tabe ia si asa. Kote poni tuturuana sa pa butubutu pude kopu soku navulu tie meke hia poni pepeso sa guana dia pinia.

⁴⁰ Totoso tava gorevura sa kinorokorotae si kote la rapata ia sa banara pa kali matao si asa, meke kote qeto vura la sa banara pa kali gede pude raza ia, turani sari nana totopili varipera, tie koi hose, meke soku vaka. Soku popoa si kote la raza i sa meke vagi i, na kote ene nuquri sa meke hola taloa guana nage. ⁴¹ Sa Popoa Tolavaena ba kote raza ia sa. Soku popoa si kote hoqa, ba sari popoa pa Moabi, Edomu, meke sari koimata pa Amoni si kote ta harupu dia pa limana sa. ⁴² Sa nana binaṇara si kote hoda kamo la koari soku popoa pu rapati sa; Izipi si keke. ⁴³ Kote vagi sa sari na qolo, siliva, meke doduru tinagotago pa Izipi, meke sari pa Libia meke pa Itiopia si kote nabulu la koa sa. ⁴⁴ Ba sari inavoso mae guadi pa kali gasa rimata meke pa kali gede si kote va matagutuna si asa, meke kote ta nazirina meke topue vura pude huari pule sari soku popoa. ⁴⁵ Kote va turu i sa sari ipi tana banara pa vari kokorapana sa kolo Meditareniani meke sa toqere hopena meke

tolavaena. Ba kote kokoi sa nana tinoa, meke loke tie kote toka nia.

12

Sa Vina Gorevurana sa Kinorokorotae

¹ Koasa totoaso asa, si kote turu kopu se Maekolo, sa nati mateana sapu lavelaveni sari mua tinoni. Kote na totoaso koa ia tinasigiti, gua sapu lopu ele ta evana pa pinodalaena sapu vura mae sari na butubutu banara kamo kamahire. Ba koasa totoaso asa, sari mua tinoni, doduru pu ta kubere pozadi koasa buka, si kote ta harupu.*

² Soku tina tie pu ele mate meke ta pomunae pa pepeso si kote vanunu pule: kaiqa si kote la pa tinoa hola, meke kaiqa si kote la pa kinurekure loke vinabetona.* ³ Sarini pu gilaedi si kote nedala guana kalalasa pa manauru, meke arini pu turana soku tie la pa tinonoto si kote nedala gua rina pinopino ninae rane ka rane.

⁴ Ba agoi Daniela, si mu tuku ia sa buka hie mamu veko nia tokoro, pude lopu kaqu ta tiro pule osolae kamo sa totoaso tava gorevura sa kinorokorotae. Soku si kote ene la meke mae, hata ia pude hoda ia sa dia tinumatumae,” gua sa tie sapu pokopoko lineni.*

⁵ Meke arau, Daniela, si dono la, meke isa pa kenuqu si turu dia sari karua tie, keke pa kali tagele mae gua koasa ovuku, meke keke pa kali tagele la gua. ⁶ Keke ari karua si zama la koasa tie pokopoko lineni, sapu turu nana pa kali sage

* **12:1** Mt 24:21; Mk 13:19; Rev 7:14, 12:7 * **12:2** Ais 26:19; Mt 25:46; Zn 5:29 * **12:4** Rev 22:10

koasa beru kolo pa ovuku, “Vea kote seunae gua meke kote tava gorevura sari tinitoṇa variva magasadi hire?” gua si asa.

⁷ Sa tie sapu pokopoko lineni, sapu turu nana pa kali sage koasa beru kolo pa ovuku, si ovulu sage nia sa lima mataona meke sa lima gedena la pa maṇauru, meke avosia rau zama tokotokoro pa pozana si Asa sapu toa hola ninae rane ka rane. Zama guahe si asa, “Kote ta evaṇa si arini pa keke totoṣo, karua totoṣo, meke pa kukuru totoṣo*.” Totoso tava kilasa va kaleana sa niniranira tadi na tie madidi te Tamasa si kote hokoto sari doduru tinitoṇa hire.”*

⁸ Avosia rau, ba lopu va bakalia rau. Ke nanasa si rau, “Qua baṇara, kote vegugua vina hokotodi sari doduru hire?”

⁹ Olaṇa si asa, “Daniela, topue taloa mua, sina sari zinama si ele ta tuku meke ta veko tokoro osolae kamo sa totoṣo tava gorevura sa kinorokorotae. ¹⁰ Soku si kote tava vulasa, loke kiskisadi meke tava via, ba sari tie kaleadi si kote tavete va kaleana eko lamo. Lopu keke ari tie kaleadi kote va bakalia, ba arini sapu gilaedi si kote va bakalia mo.*

¹¹ Podalae koasa totoṣo sapu tava noso sa vinukivukihi pa hopeke rane meke kote va turu ia sa si keke beku variva malederena sapu vata evaṇa sa tinahuara nomana, si kote koa nana si ka keke tina karua gogoto sia ṇavulu puta rane.*

¹² Tamanae sa tie sapu aqa nia meke kamo ia sa

* **12:7** Sa vesi hie si zama nia, keke vuaheni, karua vuaheni meke kukuru vuaheni. * **12:7** Rev 10:5, 12:14 * **12:10** Rev 22:11

* **12:11** Dan 9:27, 11:31; Mt 24:15; Mk 13:14

vina betona sa keke tina neta gogoto tolonavulu
lima rane.

¹³ Ba sapu agoi, si mu topue taloa mua osolae
kamo sa totooso tava gorevura sa kinorokorotae.
Kote mate si agoi meke pa vina betodi rina rane
si kote turu pule si agoi pude vagia sa pinia sapu
ta hia nia agoi.”

Buka Hope
The Holy Bible in the Roviana language of the
Solomon Islands
Buk Baibel long langguis Roviana long Solomon
Islands

copyright © 2016 Wycliffe Bible Translators, Inc.

Language: Roviana

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-06

PDF generated using Haiola and XeLaTeX on 11 Nov 2022 from source files dated 30 Nov 2021

2a5324ac-61e8-5e5b-b226-f3d15850d7c5